

四庫全書

史部

# 欽定四庫全書

史部

平定朔漢方略卷二十八

詳校官編修<sub>臣</sub>曹振鏞

編修<sub>臣</sub>裴謙覆勘

總校官進士<sub>臣</sub>繆琪

校對官中書<sub>臣</sub>鮑之鍾

謄錄監生<sub>臣</sub>許紹錦

欽定四庫全書

聖祖仁皇帝親征平定朔漠方略卷二十八

八月甲申朔

命召肅州總兵官潘育龍赴京

上諭議政大臣曰著追召肅州總兵官潘育龍偕孫思

克來京

員外士郎保奏報青海諸台吉情事先是

上命二郎保賫勅往諭青海諸台吉如伊等執噶爾丹

屬下人與之即令二郎保親身帶來併以此勅遍諭沿途居人至是二郎保報曰臣身自甘州起程出西寧邊口至青海之察罕托羅海地方見善巴陵堪布讀部發印文使之聞之又以擊敗噶爾丹斬殺俘擄之事備告堪布臣乃言堪布者乃達賴喇嘛所遣治青海之政而管理其事者也青海諸台吉有不聽堪布之言者乎堪布之意如何堪布言此事大我不得獨主其議今青

海諸台吉俱來會盟侯諸台吉同在盟壇定議  
再覆七月初八日達什巴圖爾等三十一台吉  
全到盟所以檄文授之達什巴圖爾邀臣至其  
廬彼言東方有

聖上西方有達賴喇嘛二

聖同好為年已久我青海諸台吉住居近邊六十餘年  
未嘗生一事噶爾丹殺我窩齊爾汗取我屬裔  
與我亦有仇但噶爾丹之女嫁博碩克圖濟農

之子乃聞之於西方結姻者也我等俱達賴喇嘛之徒我等諸事俱啟聞西方視其言何如遵依而行非可任我等之意覆奏也為此謹奏上命議政大臣會議議曰青海達什巴圖爾台吉既稱噶爾丹與彼亦有仇其女當聞之於達賴喇嘛遵而行之應令達什巴圖爾等將遣人於達賴喇嘛作何定奪之處備文覆部並將此等情由增入達賴喇嘛

勅諭內

上從之

命暫停經理多巴白塔兒番回之事刑部尚書圖納  
等奏言臣等會於肅州正尋議多巴等處番子  
禁其輸租於蒙古併遷白塔兒所在番子回子  
令入內地之事隨據西寧送到員外二郎保咨  
文內言青海諸台吉以收噶爾丹屬人等事推  
諉於達賴喇嘛臣等仔細尋思噶爾丹之人在

西寧所屬地方者甚少與青海諸台吉毫無干涉尚不肯收而給之況多已輸租有利於彼者乎若併欲收白塔兒衆回子番子雖與言之必不從令彰彰明甚如此必至遣兵於蒙古之地以收之矣我內地回子與白塔兒回子交易牟利則收白塔兒回子必無掣肘然西寧等處兵民大半皆是回子以回子征回子甚覺可虞且陝省兵丁之馬俱用之於進剿之兵目下陝省



馬匹亦盡矣即急催補置不能立辦今雖邊塞  
無事如我兵馬不齊亦似難行且目下總兵官  
潘育龍標兵鼓譟至劾署總兵官事遊擊王之  
秀兵丁之心始安今若外征而內地無可虞之  
事始可以行今青海諸台吉之情我邊內兵丁  
之形有掣肘大可虞之事不得不密聞於

皇上且多巴之事奉

皇上訓諭云視青海諸台吉情之順否而行今其情與

皇上所洞見者纖毫不爽應將措置多已白塔兒之事  
暫且停止或可或否臣等會商具本密題以請  
訓旨又臣等駐劄甘州其輸租於噶爾丹之西喇古  
兒黃番人等已經招降現到頭目開呈人口數  
目六千許未到頭目亦報起行而來俟到日將  
人口數目及措置之事具本另奏

上命集議皆以為應如圖納所奏行其招降黃番事目  
下無庸議

上從之

命商南多爾濟赴大將軍費揚古軍前

上諭商南多爾濟曰大將軍駐劄善巴王喀倫地方正  
在有事之際爾可乘驛往會大將軍費揚古約會  
駐劄之處著費揚古預遣人通知

命運米官兵各歸本汛召岳昇龍赴京運米侍郎李  
鈞奏言臣等運米有都御史于成龍隨行總兵  
官岳昇龍携來副將王起龍等官兵及管兵衆

官事畢歸來京中無伊等之事應令官兵皆各  
歸本汎御車人夫諸項工匠俱交地方官遣歸  
本地其陸續歸來武弁兵丁人夫工匠隨其到  
日俱遣歸本地得

旨岳昇龍著來京餘如所議

命議糧運事務侍郎李鈞奏言臣與左通政喀拜於  
科圖地方料理西路大兵給糧之事

欽召臣至京料理未完事件臣已於七月十三日起

行歸來矣科圖地方所存正米三千七十六石  
餘不知西路大兵駐科圖幾月科圖所存米足  
與不足有餘無餘不能遽定臣等以車七百五  
十九輛馬騾二千八百三十五匹夫八百五十  
三名兵五百一名留科圖備用又都御史于成  
龍堆貯察罕腦兒地方正米三千八百四十八  
石零堆貯奎宿地方正米三千七百七十六石  
零又運米兵丁夫役食剝穀米四千五百九十

二石零

上命李鈞議奏議曰奎宿等處所存米俱都御史于成龍親視堆貯交該汛扎薩克蒙古官兵謹守不議外科圖所存烏喇將軍薩卜素官兵支剩之米應交都御史于成龍左通政喀拜以留在科圖之車裝載運至察罕腦兒于堆米之所堆貯空車仍交各原管官牲口愛養解回其陸續到來車輛仍交工部捐助牲口俱交兵部三省原

備牲口仍交三省官員各帶歸本省暫養

上命集議議曰三省原備牲口俱係各省官俸衙役工食所買應仍交三省原解官帶回聽該撫料理其完全車輛分給八旗滿洲蒙古漢軍佐領藏貯其廢棄損壞車輛免其補造賠償著諸大臣收交原價其所存之米應如李鈞議

上從之

乙酉

命免防護牧圉輜重曠班各官罪先是正黃旗驍騎校署佐領西代正藍旗驍騎校署佐領巴錫鑲紅旗護軍校署佐領伍什正藍旗護軍校署叅領阿米達等俱防護輜重曠班正白旗漢軍驍騎校署佐領王惠民防護牧圉曠班奉

旨俱革職交部嚴加議處具奏至是兵刑二部會議以為定例雖無防護牧圉防護輜重曠班作何治罪款項但行軍以防護牧圉防護輜重為要



務西代等係實授防護輜重防護牧圉佐領官  
而規避曠不赴班坐此應將西代巴錫伍什阿  
米達王惠民等俱枷號三個月鞭一百

上曰西代等從寬免枷責發黑龍江披甲當差

庚寅

命查巴拜台吉屬下人歸之先是喀喇沁王扎西旗  
下附籍厄魯特台吉巴拜因屬下博克寨桑來  
請

安附奏云聞投誠之厄魯特在張家口外者有臣屬  
下人二三百

上諭尚書馬齊曰此厄魯特乃先降有功之人著撥官

一員帶此二人乘驛而往查認具奏至是馬齊等

奏曰臣部差員外諾木齊代帶台吉巴拜博克

寨桑前往認識回文云已拜台吉屬下共男子

六十三人婦女六十口童男十七人幼女二十

三口格隆班第十二人以上一百七十五口令

相識認俱云係台吉屬下人是實

上命歸巴拜台吉

辛卯

命督運于成龍事畢還京于成龍報曰科圖所存米  
三千七十六石二斗內先給撫遠大將軍同駐  
科圖官兵後給大將軍隨行官兵總兵官岳昇  
龍標下官兵共三百二十一石零又黑龍江將  
軍薩卜素七月十六日到科圖至八月十六日

一個月口糧支四百九十一石所剩之米二千  
六十四石零于是問烏喇兵再支幾月之米將  
軍薩卜素言我不能預定俟一月終再支目下  
科圖所在牽挽米車人夫及綠旗兵以京城備  
解穀米一百四十日已將給完或再給烏喇將  
軍官兵數月及給剩之米或在科圖暫俟烏喇  
將軍或運回至察罕腦兒貯米之處堆貯統俟  
部定奏至

上曰科圖所在黑龍江將軍薩卜素官兵給至十月初  
一日口糧歸途行糧不必支給即將坐糧為食而  
歸押車人夫綠旗兵丁食米若完亦於此所剩米  
內酌給勿使困之此事著于成龍等八月內料理  
完畢回京

壬辰

理藩院員外舍稜奏報厄魯特丹巴哈什哈之  
妻諸人來降及噶爾丹情形舍稜報曰臣率喀

爾喀公車木楚克納木扎兒等向土喇前行至  
一地名衛徵克勒德地方差公車木楚克納木  
扎兒旗下佐領蘇布體博羅長史查木巴拉配  
兵各十名分三路哨探蘇布體前往見一隊行  
人即近前視之乃厄魯特人也因擒之而歸問  
之供言皆噶爾丹屬下人吾名莽奈我夥伴十  
四人我等在噶爾丹地方聞我厄魯特之人來  
降

聖上不殺加以厚恩特此來降我等以外別無他人七  
月初四日自塔米爾地方來我等戰敗各自逃  
竄至塔米爾見噶爾丹欲會盟以議行止往召  
阿拉卜灘阿拉卜灘至噶爾丹言欲往翁金掠  
其界上人取糧以往哈密丹濟拉言我等之力  
不能往翁金欲往阿爾台阿拉卜灘丹津俄木  
布言欲掠俄羅斯之哈喇特布喇特等之糧往  
阿爾台衆論與噶爾丹之意不合故無定議而

散阿拉卜灘丹津俄木布不願往翁金而敗遁之時噶爾丹屬下馬駝被丹津俄木布屬下竊騎而去故相會之後噶爾丹查此馬駝使還原主丹津俄木布不從是以內自不睦阿拉卜灘與丹津俄木布善故叛噶爾丹去路遇明古特人等收而取之宿于吉齊根特之地隨走洪郭爾阿拉卜灘等自得明古特之後有兵二千餘噶爾丹丹濟拉土爾伯特之車陵伊拉古克三



庫圖克圖俱同往塔米爾我等不知其所往噶  
爾丹有兵千許阿拉卜灘未叛噶爾丹之前噶  
爾丹下人言我等居無廬食無食衣無衣從彼  
以死而已盡於未寒之先覓一有國土之地乎  
下人互相嗟怨如此至我等來時達賴喇嘛所  
差使人達爾漢俄木布到現在噶爾丹處于是  
查厄魯特降人計箭手十一人婦女三人內有  
丹巴哈什哈之妻丹巴哈什哈之弟索諾木之

妻又有丹巴哈什哈之兄子名胡代丹巴哈什  
哈之妻達氏言我自別我丈夫隨噶爾丹至塔  
米爾地方聞我丈夫在此我乃告於丹津俄木  
布曰我夫妻向與爾無仇我丈夫既往降

聖上乞爾使我與丈夫完聚丹津俄木布曰我將遠避  
噶爾丹定一栖止之地欲遣使於西方策旺喇  
卜灘併遣使於

聖上俟遣此使時帶爾同去我欲待使人偕行恐其遲

久故我先逃來歸降

聖主於是以丹巴哈什哈之妻等十三口送交安王等  
沿途小心押護給之糗糧送與丹巴哈什哈完  
聚外臣不往土喇率兵回至喀倫以待將軍費  
揚古為此將收獲厄魯特之事奏聞併以降人  
莽奈交小校俄木克圖解往

上曰著以此示議政大臣

癸巳

命遣官召回回國王阿卜都里什特赴京先是郎中  
滿都密報曰召回國阿卜都里什特汗及其子  
額爾克蘇爾唐自厄魯特噶爾丹處來降告曰  
康熙二十一年噶爾丹遣人於我誑言議事我  
等往所約伊里地方噶爾丹盡執我父子及從  
人帶我等各處行走今

皇上大兵擊敗噶爾丹之次日我等纔得脫身來歸  
聖朝近聞厄魯特人言噶爾丹本身有二千許人在古

爾班塔米爾臺庫魯地方廬帳什物皆無噶爾  
丹既窮斷不能久居塔米爾殆往青海耳舍哈  
密土魯番葉爾欽三路外別無他路如從哈密  
往則哈密與嘉峪關相近嘉峪關有

皇上大兵必不去也未必不奔往土魯番若葉爾欽則  
有我回回兵二萬許在彼土魯番則有五千兵  
哈密則有五百兵又聞策旺喇卜灘住扎博羅  
塔喇我父子受噶爾丹拘執十四年之苦我今

已老雖入中國蒙

聖主天恩度日並無可報効噶爾丹不但有執我之仇  
我回子通國俱有仇現今噶爾丹敗困流行之  
際我願得留我子媳諸孫於此我身攜我妻默  
民白克往土魯番以

聖上好生之德宣諭我屬下衆回子策旺喇卜灘所居  
博羅塔喇與土魯番相近往與策旺喇卜灘合  
謀如噶爾丹來人少則執之以報我父子十四

年受辱之仇謹奏

上命議政大臣集議議曰

皇上神威擊敗噶爾丹而回回國君阿卜都里什特即  
入降今欲留其子媳諸孫於此而其身往土魯  
番以

聖上好生之德宣諭衆回子且與策旺喇卜灘合謀邀  
執噶爾丹誠心諄請自當准行令理藩院差官  
一員往召阿卜都里什特併其妻默民白克至

京加之

恩賜撥賢能官一員送至嘉峪關令地方官量撥本地回子足給坐馬口糧遣出嘉峪關

上曰著遣官召阿卜都里特本身及其妻子諸孫星速赴京可傳旨云其妻子諸孫俱一同遣歸不必留此

命議收撫巴爾虎之事先是理藩院奏言前令黑龍江將軍薩卜素如遇生巴爾虎收之而來後據



薩卜素以收巴爾虎之事復行奏請得

旨巴爾虎之事已經遣人往諭該屬車卜登貝勒矣  
俟所遣人歸當再遣人往諭將軍薩卜素今奉

旨云著將軍薩卜素於回汛之時乘便來赴京城修  
整行裝遣使歸去則收巴爾虎之事當如何處置  
為此請

旨

命議政諸臣集議至是議曰今將軍薩卜素來京則

收生巴爾虎之事不當交將軍薩卜素應檄貝勒汪扎兒扎薩克台吉阿里雅阿爾薩郎衛賽桑等云生巴爾虎等可收則收之如不可收則將巴爾虎所居何地人數幾何奏明之時再議上曰今無生巴爾虎矣汪扎爾貝勒屬下齊巴齊努特他布囊古特六百戶在扎薩克台吉阿里雅阿爾薩郎衛賽桑處其夥伴五百戶在呼倫之烏冷地方已有旨諭汪扎兒貝勒之母波底素克云爾可

收汝之人如不能收朕將收之至呼倫所在他布  
囊古特則車陳汗奏言奪竊其牲畜臣之人民少  
如皇上以此給臣臣將收之倘收而不服將以力  
取之亦已有旨諭之云伊等俱有主汪扎兒貝勒  
之母波底蘇克喀通將收此他布囊古特等如不  
能收朕另有裁奪不便將伊等給汝

命暫停屯兵之議先是理藩院奏言自正藍旗察哈  
爾界上至喀爾喀河理合屯兵請差大臣往視

得

肯屯兵之地應否差大臣往視著集議至是議曰今  
皇上親統六師擊敗厄魯特噶爾丹噶爾丹棄其妻子  
躬身逃遁窮困已極滅在旦夕應暫停差大臣  
往視屯兵之地俟噶爾丹實有聲息其時再將  
往視屯兵之事應行應止復議具奏奏入

上從之

甲午

遣使賁

勅往諭達賴喇嘛班禪達賴汗第巴策旺喇卜灘先是達賴喇嘛達賴汗第巴等使人於六月三十

日到京

上簡次等大喇嘛晉巴扎木素德木齊索諾木臧布主事保住為使賁

勅往諭達賴喇嘛等至是保住以其行事繕摺奏請訓旨第巴倘仍如前以達賴喇嘛坐禪不可得見為

辭則將如何若第已以為將遣班禪來則臣即携之來乎抑先遣人奏

聞乎倘到彼地而遇策旺喇卜灘使人則當如何宣諭至噶爾丹流散之人及其四圍居人有願降者即率之來乎為此具奏請

旨得

旨托言達賴喇嘛坐禪不使相見之事勅內開載甚明如第已堅執不使相見爾等取其根據決絕而

歸如云遣班禪來則先奏聞衆厄魯特有來降者  
俱携之來晉巴扎木素德木齊索諾木兩喇嘛但  
為彼識達賴喇嘛之面而差之耳非為行事也保  
住朕簡用爾此行事關重大爾對第巴言諸事須  
著實紫峭照常尊稱達賴喇嘛班禪如第巴又言  
達賴喇嘛將使垂楞為之卜爾但詰之曰垂楞所  
禱祠者惟達賴喇嘛耳達賴喇嘛尤有問垂楞而  
行之理乎至達賴喇嘛身故果真則言使班禪主

喇嘛之教待為至尊爾務索濟隆庫圖克圖而來  
如發濟隆來萬事俱休如第巴以殺濟隆革喇嘛  
為疑爾則極口保之如不遣濟隆來爾則謂第巴  
曰爾為一人而傷億萬生靈有是理乎如不從聖  
上之旨我聖上豈輕已乎凡事爾當深計日後雖  
悔莫追矣至勅內開載使遣汝等歸及正月到京  
爾但一到即言奉聖旨限我等正月到京如正月  
不到必殺之爾如略使久留我等亦居於此耳斷



不歸去矣爾等欲殺則殺我等數人無甚關係或有為之報仇者亦未可知併將爾往使於噶爾丹噶爾丹拘禁爾三月使徒步而歸之事俱口語第已如在其地遇策旺喇卜灘之使爾其略加平和以噶爾丹前後諸事詳告之言我聖上無誅噶爾丹之意至今猶使將軍留大兵以招撫噶爾丹保  
住又奏曰保住一介庸愚蒙

皇上簡充信使事關重大願得欽遵

聖諭行事星速歸來復

命如與達賴喇嘛使人同往恐行遲日久請携達賴  
汗第巴使人前行

上許之令保住十一日起程尋理藩院奏言達賴汗第  
巴使人偕保住先起程達賴喇嘛使人於本月  
十五日起程

上曰善

諭達賴喇嘛曰朕統御寰區以生成為務尊崇佛教

以道律為本故特往召班禪將以化導悖亂中外  
禮法歸一也爾喇嘛與朕從來意誼如一交好六  
十餘年想已將朕深眷之心宣告班禪是實但第  
已與噶爾丹朋比恐嚇班禪言噶爾丹之兵將要而  
殺之不遣之行先是烏闡布通之役遣濟隆庫圖  
克圖為噶爾丹誦經擇戰日及噶爾丹敗又誘我  
軍講和遂使噶爾丹得以遠遁朕與喇嘛向來同  
心相好有年深知斷不作此舉動明皆第已指喇

嘛之名而為之也至噶爾丹大敗於烏闌布通將走之時頂爾所給威靈佛像於首誓不復犯歸降聖朝之喀爾喀矣乃去歲背誓至克魯倫內青城地方掠納木扎爾陀音朕數遣使問故而怙惡不悛不見我使敢行無禮奪其馬徒步遣歸朕乃震怒調兵親統六師近逼噶爾丹彼猶不知朕不忍遽加誅滅矜憐衆生死亡諭噶爾丹會盟定議喀爾喀之事差長史多禪中書阿必達賁勅且遣所

擒厄魯特生還曉以我兵各處堵截之事噶爾丹  
又奪使臣護送兵丁之馬褫使臣之衣朕又遣彭  
素克格隆等問故而竟不遣歸朕沿克魯倫而上  
以探使人聲息噶爾丹不能抗朕之威棄其廬帳  
器械什物遁至特勒爾濟地方遇我堵禦西路  
大將軍費揚古之兵噶爾丹復先攘臂我兵即大  
破噶爾丹盡俘之臨陣阿奴等諸貴人亦被殺斬  
有名賽桑等甚多共殺厄魯特二千餘其丹巴哈

什哈察罕西達爾哈什哈等皆來降盡獲其馬駝  
牛羊噶爾丹棄其佛像經籍以及各色物件僅携  
二十許人先衆逃入林中朕留喀爾喀兵務索噶  
爾丹執而誅之噶爾丹敗好克惡已極以致絕滅  
此喇嘛來使親身灼見而去者也至降人厄魯特  
言達賴喇嘛卜云噶爾丹東征吉此種指使噶爾  
丹及阻止班禪之事皆第巴目無爾達賴喇嘛之  
所為也朕明知之朕不以爾事之有無介意是以

別降旨於第巴茲為滅噶爾丹告捷禮以噶爾丹  
佩刀一阿奴之佛像一佩符一特遣使賫往併發  
伴勅禮緞十匹又朕嘗遣員外二郎保往諭青海  
達什巴圖爾等台吉云如有噶爾丹之人在汝等  
地方執之解來據二郎保報稱青海達什巴圖爾  
等三十一台吉俱到盟所已將檄文遍給諸台吉  
矣達什巴圖爾邀臣至其廬彼言東方有聖上西  
方有達賴喇嘛兩聖同好歷有年所我青海諸台

吉近邊居住六十餘年未嘗生一事噶爾丹殺我  
俄齊爾圖汗取我屬裔於我亦有仇但噶爾丹之  
女嫁博碩克圖濟農之子乃啟聞西方而結姻者  
也我等俱達賴喇嘛之徒我等凡事皆啟聞西方  
彼地之言如何則遵而行之不得據我等之意覆  
奏故檄達什巴圖爾等遣人於達賴喇嘛後作何  
定奪速備文知會理藩院為此諭達賴喇嘛知之  
其達什巴圖爾台吉等蒙古原文併發



勅諭班禪庫圖克圖曰朕撫御萬邦無分中外一視同仁尊崇佛教以道法歸一為要務今以達賴喇嘛已老爾庫圖克圖道法不二勤脩不倦誦經行善特往召爾庫圖克圖朕將與爾同化導悖亂使中外道法歸一而第巴心懷嫉妒與噶爾丹朋比恐嚇爾庫圖克圖言噶爾丹兵將要而殺之阻不使行先是烏闡布通之用兵也第巴亦指達賴喇嘛之名遣濟隆庫圖克圖為噶爾丹誦經且擇戰

日及噶爾丹敗後又詭言講和以悞我軍使噶爾丹得以遠遁朕已別有勅諭第巴指出第巴種種助噶爾丹之事及阻爾不行之舉當噶爾丹大敗於烏闌布通遁走之時頂達賴喇嘛所授威靈佛於首誓不復侵歸降聖朝之喀爾喀矣去歲背誓至克魯倫內青城地方掠喀爾喀納木扎爾托音朕屢遣使問故而彼怙惡不悛不見我使輒行無禮奪其馬徒步遣歸朕乃震怒調兵親統六師近

逼噶爾丹彼尚不知朕猶不忍遽滅之憫念噶爾丹之死諭噶爾丹姑來會盟定議喀爾喀之事使公主長史多禪中書阿必達等賁勅釋所擒厄魯特生還曉以我兵各處堵截之事噶爾丹又奪使臣護送兵丁之馬褫使臣之衣朕又遣彭素克格隆等問故竟不遣歸朕於是循克魯倫而上噶爾丹不能抗朕之威棄其廬釜器械什物遁至特勒爾濟地方遇朕所遣堵截西路大將軍費揚古兵

噶爾丹又先攘臂我軍遂大破噶爾丹盡俘之臨  
陣阿奴等諸貴人亦被殺斬有名賽桑無算共殺  
厄魯特有二千餘之數其丹巴哈什哈察罕西達  
爾哈什哈等人俱來降盡獲其馬駝牛羊噶爾丹  
盡棄其佛像經籍以至各色物件僅率二十許人  
先衆遁入林中朕留喀爾喀兵務索噶爾丹擒而  
殺之噶爾丹敗好克惡已極至於永滅特遣使諭  
知併發帑禮幣八端

諭達賴汗曰朕欽崇佛教總持道法但皈道法之人  
則嘉之悖道法之人則懲之爾自顧實汗以來同  
心專尚宗喀巴之道與本朝和協至爾汗之身益  
誠信不渝舊好頃者噶爾丹陽護宗喀巴之佛教  
陰主悖逆之邪行詐傳達賴喇嘛之語遍地興戎  
殺掠喀爾喀毀壞道法而第巴反從中聳恿烏闌  
布通之後遣有玷僧規之濟隆庫圖克圖為之誦  
經且擇戰日及噶爾丹敗後又借講和以誤我軍

使噶爾丹得以遠遁後又指達賴喇嘛之言南征  
吉大慶也種種煽誘噶爾丹遂敢背誓至土喇克  
魯倫等處劫奪我納木扎爾陀音朕始親率大兵  
出討分路剿滅之夫第已者乃達賴喇嘛下司事  
之人理應篤敬道法今反不遵達賴喇嘛而欺凌  
衆人是以朕別有旨深加責讓惟爾汗不違前好  
朕使之往依然敬待每對使款接時預以噶爾丹  
之事密使聞之朕灼知爾不忘舊好甚堅且篤凡

敗壞道法煽誘噶爾丹者汗殆知之也至青海諸  
台吉亦與之無涉是以特遣使以示褒善貶惡之  
意併發伴勅禮幣八端

諭第巴曰朕崇道法而愛衆生故實心以護道法者  
加之眷祐陰誘人以壞道法者加之罪譴爾第巴  
原係達賴喇嘛下司事之人因爾不違達賴喇嘛  
之旨輔助道法朕是以優封爾為土伯特國王今  
觀爾陽則奉宗喀巴之教陰則專與噶爾丹比欺

達賴喇嘛班禪庫克圖而壞宗喀巴之教先是  
爾以久故之達賴喇嘛詐稱尚存遣濟隆庫圖克  
圖至噶爾丹所烏闡布通之役為噶爾丹誦經且  
擇戰日及噶爾丹敗又以講和為辭貽誤我軍使  
噶爾丹得以遠遁朕為衆生遣人往召班禪庫圖  
克圖爾又誑嚇班禪庫圖克圖謂噶爾丹將要而  
殺之而不遣行青海博碩克圖濟農潛與噶爾丹  
結姻往來通使而爾又不舉發如噶爾丹博碩克



圖濟農無爾之言有相與為姻者乎噶爾丹信爾  
唆誘之言故不遵朕之旨昔噶爾丹在烏闌布通  
大敗而走之時首頂威靈佛立誓乃背棄誓言去  
年至克魯倫左側掠我喀爾喀降人朕特遣員外  
阿爾必特祐為使問其事因乃噶爾丹不即見我  
使臣遲之日久反盡奪其坐馬徒步遣歸繼又遣  
侍衛克什圖筆帖式薩哈連等為使仍前盡奪其  
馬匹徒步遣歸其後又遣主事保住為使亦如此

遣歸是以朕大震怒調集各路兵馬親統六師近  
逼噶爾丹即欲率大兵剿滅之又不忍衆生橫罹  
鋒鏑特遣公主長史多禪中書阿必達為使賫勅  
往諭噶爾丹曰朕將與汝會好言定議喀爾喀之  
事爾勿疑懼朕斷不欺罔人也不意厄魯特噶爾  
丹仍克惡不已奪我使護送兵丁之馬褫使臣之  
衣又遣彭素克格隆賫勅特問其故仍未遣歸朕  
正待所遣使臣聲息遡克魯倫而上噶爾丹畏朕之

威棄其子女廬釜而遁至特勒爾濟地方遇西路  
大將軍費揚古等大兵噶爾丹即來拒戰大兵乃  
進擊之噶爾丹不得旋踵遂大敗陣斬阿奴併斬  
沙津車陳寨桑古英寨桑孔郭羅額爾克寨桑根  
敦寨桑俄爾古克圖卜新寨桑額爾克台吉楚呼  
拉格隆厄魯特人二千餘被殺回回國王阿卜都  
里什特厄魯特台吉韓都塞冷扎卜梅寨桑馬穆  
古英寨桑巴圖爾台吉顧祿默爾根台吉額林辰

哈什哈古英吳巴什筆齊齊等及厄魯特二千餘人皆來降盡獲其子女駝馬牛羊廬帳噶爾丹僅率二十許人而遁丹巴哈什哈察罕哈什哈等來降博碩克圖濟農遣往噶爾丹使人羅壘厄木齊等被擒皆言達賴喇嘛歿已九年矣達賴喇嘛者乃至大普慧喇嘛本朝為護法之主尊奉六十餘年則其計音即當奏聞於朕爾乃匿而欺衆倚噶爾丹以興戎其罪甚大降人丹巴哈什哈又告曰

噶爾丹聞上親統六師已到克魯倫遁走之時傳  
語衆人曰我來此克魯倫非吾意欲深入也奉達  
賴喇嘛之旨云南征元吉大有慶也我是以深入  
蓋達賴喇嘛殺我而我殺爾衆矣達賴喇嘛與朕  
道法合一相敬有年如達賴喇嘛尚存決無此等  
事明係達賴喇嘛亡後爾私指達賴喇嘛誑噶爾  
丹也爾之所行為道法乎抑為已行詐乎朕乃養  
育衆生之元后彰善癉惡斷然不與爾果改過仍

思遵宗喀巴之道奏明達賴喇嘛已故始末尊奉  
班禪庫圖克圖使主喇嘛之教副朕之召遣之使  
來執濟隆庫圖克圖以畀我解青海博碩克圖濟  
農所娶噶爾丹之女朕仍前待汝以尊崇之禮不  
然數者或缺其一朕必問爾詭詐欺達賴喇嘛班  
禪庫圖克圖助噶爾丹之罪發雲南四川陝西等  
處大兵如破噶爾丹之例或朕親行討汝或遣諸  
王大臣討汝爾向對朕使喇嘛言四厄魯特為爾

護法之主爾其召四厄魯特助汝朕將觀其助汝  
何如也爾其速辦此事及正月星速來奏否則後  
悔無及矣為此特遣使臣往諭併發伴勅禮幣六  
端

諭策旺喇卜灘曰朕統御寰區遐邇一體仁育萬民  
皆欲使之共享安樂朕躬為一統之主懷保萬方  
獎善良懲克逆未嘗或爽先是爾策旺喇卜灘  
陳奏噶爾丹之狡詐與侵害爾之實情誠心懇請

眷恤朕嘉爾恭順全受爾之貢獻且以噶爾丹狂悖不靖闌入烏闌布通為朕偏師所敗跪誓於威靈佛前後又背誓害我使臣掠喀爾喀沮止班禪庫圖克圖之來又至巴顏烏闌將為禍亂其意顯露因發三路大兵剿殺噶爾丹諸事降勅詳諭矣朕親統中路大兵近逼噶爾丹即欲率大兵剿滅之又不忍衆生橫罹鋒鏑是以暫停撲剿遣諭噶爾丹使與我會好定議喀爾喀之事爾勿疑懼朕



躬俟使臣覆奏遡克魯倫而上噶爾丹聞之不能  
抗天威心胆俱裂棄其子女廬帳釜鑕什物遁去  
遇朕所遣堵截西路大將軍費揚古兵於特勒爾  
濟之地噶爾丹即來戰大兵乃進擊之噶爾丹不  
得旋踵遂大敗斬噶爾丹之妻阿奴及厄魯特二  
千餘人丹巴哈什哈察罕西達里哈什哈等二  
千餘俱降盡俘獲其人口馬駝牛羊廬帳什物噶  
爾丹丹濟喇丹津俄木布阿喇卜灘等紛紛潰遁

噶爾丹今已困窮矣爾向誠心肫篤請安進貢不  
絕於道與噶爾丹有不共戴天之仇噶爾丹窮克  
極惡不可留於人世一刻尚存即為生民之不利  
務必剷除以安厄魯特蒙古之生今或流行爾屬  
下厄魯特地方或奔往哈密地方如生擒噶爾丹  
則擒之來殺之則以其首來如此則爾向來恭順  
之心益著而朕眷顧之恩益無窮矣至於達賴喇  
嘛班禪庫圖克圖達賴汗第巴等皆有勅諭之并

以其蒙發爾知之

丁酉

命停點巡邊大臣尚書馬齊奏曰請照前例點巡邊

大臣

上曰著停派大臣巡邊

厄魯特巴拜台吉奏請

禁廷効力理藩院奏曰附籍喀喇沁扎什王下巴  
拜台吉呈稱我原以身獻

皇上而不能為

皇上効力乞使灑掃街道為此具奏

上曰已拜先衆來降朕另有旨加恩著彼暫率其人歸

去已拜台吉又呈稱恭逢

皇上親征擊敗噶爾丹凱還奏

賀之便以我屬裔來降之事奏

聞蒙

皇上俯憐以我屬裔復歸於我但

皇上恤我屬裔而我力不能帶回乞給驛遣歸為此具

奏

上曰著給之驛傳

己亥

宥額駙尚之隆等罪諸王公等免察議先是

上諭議政大臣曰是行也皇七子實隸鑲黃旗軍中其副都統兼長史穆森至鑲黃旗來甚倨作氣勢奏請已給兵丁之米令彼執事人員支取皇子日用

之物俱遲悞不給向來軍中功罪俱自途間開冊  
携歸是役之事皆朕親裁故無冊籍朕不舉出更  
無大臣知之穆森本身官職副都統長史俱革去  
著議政諸臣議罪具奏此旗原交額駙尚之隆都  
統杜思噶爾理事官溫達料理營務著將伊等一  
併議奏與朕子同行之人朕若不舉出則事不公  
有得則自任之有失則嘿然可乎至王以下公以  
上朕皆指授某旗某營或有違朕指揮隨意而行

者此皆關係軍政朕不舉出誰復舉之至撥前鋒  
二百名護送使臣以喀瓦爾達阿喇卜灘為首併  
以俄齊爾台噶爾臧額駙亦為首朕諭而遣之曰  
爾等勿過燕圖庫列圖即自彼地縱去乃達朕旨  
前往致被厄魯特奪去如許馬匹亦著議政諸臣  
會同察議至是議政諸臣議穆森乃

皇七子長史而

皇子日用之物俱遲悞不給又在

皇子鑲黃旗中不黽勉効力甚倨傲故作氣勢已  
給兵糧數尚不敷乃請使執事人員支取殊為  
不合應將穆森鞭一百不准折贖額駙尚之隆  
都統杜思噶爾理事官溫達交理

皇七子鑲黃旗營務穆森甚倨傲故作氣勢

皇子日用之物俱遲悞不給並不劾奏又穆森欲  
將已給兵糧令執事人員支取並不沮之一同  
奏請不合應將額駙尚之隆都統杜思噶爾督



捕右理事官溫達俱降三級調用尚之隆原銜  
內大臣兼太子太保革去太子太保抵降一級  
罷內大臣仍降二級隨旗行走至違

指揮之王公等俟

命下之日察議入奏得

旨尚之隆革去太子太保抵所降一級仍降二級畱  
任杜思噶爾溫達俱降三級從寬免調用畱任穆  
森從寬免責諸王公內有効力者亦有不効力者

此役已竣大兵凱旋從寬免察議

癸卯

侍讀學士喇錫奏報噶爾丹情形喇錫奏曰臣等至工噶牢臺噶爾丹屬下額圖格等來降言噶爾丹阿喇卜灘等俱在塔米爾欲從翁金前往瀚海雖此言真偽尚不可料當驗明噶爾丹等人之衆寡所向之地再商行事及到噶薩納之察罕奴和乃我大兵擊敗噶爾丹之地七月

十二日遣正藍旗佐領恩格森等令從俄爾洪  
土喇總路直至塞稜格驪探又備印文發根敦  
代青交恩格森去訖又於塔米爾地方差都統  
噶爾旦等照前驪探聲息臣等親身于伊等未  
還之際在特勒爾濟河上下懃山四圍山谷林  
莽之中搜厄魯特所委棄之人七月二十一日  
至土喇駐扎烏列臺河上恩格森等歸言我等  
於本月十六日到塞稜格河之古爾班古庫兒

對岍見無小路於是沿河岍上下行三四十里  
躡覓新舊踪跡俱無原思得小路則渡河再為  
躡覓因不得小路我等在彼地宿次日方回噶  
爾丹等未嘗往俄爾洪土喇總路去視其行踪  
蓋遡特勒爾濟而上至扎克墩地方後渡土喇  
河向西南去矣根敦代青之踪跡音息亦無我  
等於奎塔爾地方遇阿喇卜灘屬下男婦十二  
人騎馬十二匹帶烏鎗二桿撒袋二副刀二口

來投我軍今携之而來問之據俄齊爾等言我  
原係右翼扎薩克圖汗屬下俄兒哈諾特之人  
自破扎薩克圖汗後我兄弟二人遂離衆人略  
帶所剩牲畜往居瀚海之內採捕狐獸度命後  
牲畜漸完不能資生前年乃降厄魯特在阿喇  
卜灘下阿喇卜灘被

皇上大兵擊敗遁走之後我等亦隨之遁走阿喇卜灘  
對其寨桑等言曰我輩除各自身命妻子外其

餘衆人俱不能保矣是以我等恐見殺取我一  
二牲畜而去自扎克都兒內阿喇卜灘屬下厄  
魯特人齊倫夫婦及我兄弟各携妻子向此逃  
來半路又遇數起潰走者盡奪所餘此須牲畜  
徒步而行又拾得我所棄馬二匹然無糗糧各  
處採捕狐獸將及兩月仍住居此處過佐領恩  
格森帶之前來本月二十五日噶爾旦等到慙  
山見臣告曰我等循土喇行視噶爾丹遁跡本

月十八日到塔米爾之布爾哈見厄魯特一人  
亦無有住彼地數日之跡於是我等留人於其  
地撥什庫俄爾和代及我四人向翁金之路塞  
稜達什等四人向臺庫勒之地躡探踪跡見臺  
庫勒以內有彼來踪無外去之跡乃起程向翁  
金行一二日又有向西南斜去順顏塔而往之  
跡因青草茂長踪跡不甚分明視其各處煮肉  
為食行竈之灰似從我等所到之地起程前往

十日有餘矣於是我等回又縱橫躡探並無踪跡噶爾丹等往類塔是真云切思塔米爾之地距慙山千里有餘噶爾丹等自塔米爾前去又二十餘日地里相隔甚遠是以不能復遣人臣等在慙山四圍候其聲息使人躡探慙山前後土喇河上下並無踪跡聲息臣等乃率車陵扎卜阿爾薩闕衛寨桑等兵正將歸時本月二十九日丹巴哈什哈嫡姐夫噶爾丹屬下祁齊克



默爾根薩圖二人來降告曰我等戰敗之後尋覓妻子不得於是我等隨我汗之踪到塔米爾始知我妻子已與丹巴哈什哈同降我等即欲來投

聖上而不得其便是月初四日丹津俄木布叛噶爾丹去初五日噶爾丹親率兵往追之乃乘其隙於初六日我兩人騎馬七匹隨大兵之踪向慙山而來中途遇烏里揚海之人奪我等馬我等徒

步而行纔得至此前者噶爾丹到塔米爾後各遣人召衆共議將視無兵之地掠瀚海四圍居民取其糗糧以往哈密丹津俄木布言哈密皆村落我不慣居其地議定後阿喇卜灘因行裝在額得爾齊牢是以阿喇卜灘隨噶爾丹行二日往取行裝後丹津俄木布率其所轄左翼於是月初四日叛向西而去博羅特寨桑和碩齊亦在丹津俄木布所潛遣人來告噶爾丹曰丹

津俄木布叛汝與阿喇卜灘合往投策旺阿拉  
卜灘我不能脫身無可奈何隨之而去如得一  
藏身密地我將留與汝會噶爾丹方知之遂不  
往翁金遣妻子赴庫冷白爾齊爾相待其身儘  
其所有率兵千許往追之我等次日即向內逃  
來不知其後如何聞有棄丹津俄木布而來者  
言明安特納馬什希台吉率五百人亦隨丹津  
俄木布而去兩起相合其人殆有千餘阿喇卜

灘蓋一無所預自覓生路去矣若丹濟喇則斷  
不肯噶爾丹也我等明知大軍早還向喀倫大  
道而行固近然不識其途聞瀚海又無水土喇  
克魯倫乃我等所知之地雖不能追赴軍中然  
隨大兵踪跡想可到喀倫是以從此來聞丹巴  
哈什哈之妻亦逃未知得出與否如再有一二  
逃來之人想亦由我等行踪而來耳因其言如  
此恐來降者果從土喇來地之相去甚遠無人

收集必至有乏糧之困且噶爾丹丹津俄木布  
交惡相攻其潰散之人欲前去者前路又遠未  
必不至土喇懋山地方捕獸取魚以度生命是以  
臣等量糗糧之數率車陵扎卜旗下兵二百名  
阿里雅扎薩克兵五十名暫於懋山四圍守候  
聲息遣人躡探為此奏報

命撤坐塘人員

上諭大學士伊桑阿曰此行坐塘人員勤勞奏績不與

運糧各官同今已戒寒著該部行文撤回內除馬  
匹倒斃缺額外其効力人員俱交部議叙

允大將軍費揚古調發蒙古兵費揚古奏言臣率黑

龍江兵五百名於七月二十五日起行赴王善

巴喀倫已經報部外其達爾漢親王四子部落

毛明安三吳喇忒六旗每旗乞發兵一百歸化

城土默特兩旗乞各發兵一百遣至臣所居

善巴王喀倫之地亦皆報訖至王善巴之兵俟

臣到後與王善已同商酌發其所需之米俟到其地之後隨宜度勢扣兵足用之數留貯其餘交王國昌令給七旗所留米數俟定後報部

上交該部議理藩院議以為所發兵應皆如大將軍所奏撥發其給兵米數聽大將軍奏

聞

上從之

督運于成龍等奏報以米給黑龍江將軍官兵

餘米運貯察罕腦兒于成龍等報曰黑龍江將  
軍官兵僕從共一千二百三十三口自八月十  
六日起算至十月初一日止共給四十五日口  
糧三百六十九石九斗零其餘米一千八百九  
十四石零於本月十二日自科圖運回堆貯察  
罕腦兒為此奏報

甲辰

尚書圖納奏報招撫黃番黑番圖納報言臣與



總督吳赫提督李林隆署理巡撫事布政使戈  
洪同駐甘州招撫噶爾丹納賦人西爾古兒黃  
番頭目伊扎卜順等男婦大小六千七十九口  
黑番頭目喇咱噶卜楚等男婦大小一千一百  
六十九口共七千二百四十八口此外管理伊  
等坐收賦稅者乃噶爾丹屬下厄魯特達爾漢  
寨桑布爾奇等大小一百六十八口亦俱招降  
因伊等係真正噶爾丹屬下厄魯特人故於八

月初四日令彼起行赴京奉

旨事理俱畢臣亦於八月初四日自甘州起行赴京  
為此奏報

命宥候驛官員罪查驛兵部員外常泰舉奏知縣魯  
貽哲等文武官員站馬缺少驛務廢壞部議分  
別降級罰俸具奏

上曰此所查驛乃未出兵以前之事既出兵以來此路  
驛站並無違悞俱從寬免治罪

丙午

命撥官護送回回國王阿卜都里什特至西寧先是  
上諭理藩院曰著問京城四圍居住回子有願自備資  
力護送回回國王阿卜都里什特等至西寧回子  
葉大魁處者送到歸來之時議叙其往運米之楊  
回子亦著召問至是理藩院奏曰集問在京回子  
有前次運米候缺主事回子楊國琳候缺守備  
王嘉謨候缺知縣改肇新俱情愿自備坐馬衣

服沿途食物護送回回國王阿卜都里什特等  
至西寧回子葉大魁處其中應撥何人護送謹  
奏請

旨

上曰著撥候缺主事楊國琳不必再遣部員即交彼遣  
行尋理藩院又奏曰本月二十五日

皇上御殿回回國王阿卜都里什特及其子額爾克蘇  
爾唐謝

恩謝畢飲茶應令阿卜都里什特坐於貝子之下額爾克蘇爾唐坐於公之下又四十九旗諸王台吉及喀爾喀等謝

恩俱與中國諸王大臣官員同班行禮回回國王阿卜都里特等無有朝服應使另為一班行禮

上從之

命黑龍江將軍薩卜素赴京

上諭兵部曰著檄諭將軍薩卜素云其兵已給米至十

月初一日為止如携兵到京餵馬則道途迂曲著將軍薩卜素以兵交賢能之人從邊外發回薩卜素自身量帶人員來京若此軍之馬瘦難以到家薩卜素同帶至京養馬而去薩卜素不必再奏請旨一面起行一面奏聞

揚威將軍舒恕奏請赴大將軍費揚古軍中將軍舒恕侍郎滿丕奏言大將軍伯費揚古率兵往善巴王喀倫臣等前次奉查之事已俱奏

聞外目下歸化城更無別事大將軍伯費揚古既領  
兵在喀倫臣等願往大將軍伯費揚古軍中効  
力

上允之

命安郡王馬爾渾回京

上諭大學士阿蘭泰尚書馬齊曰大將軍伯費揚古既  
在喀倫可著安王率兵徐行養馬而歸著員外舍  
稜在安王駐劄之地偵探聲息

丁未

命革俄齊爾邵塞他布囊之職先是土默特多羅達爾漢貝勒額爾德木圖奏言去年有厄魯特之警而備兵也四等他布囊俄齊爾邵塞詐稱患病不往臣親與協理他布囊善達俄齊爾俄齊賴台吉羅卜藏等會議將俄齊爾邵塞照律罰馬五十匹今俄齊爾他布囊屬下佐領官額林辰等首言康熙十四年察哈爾布爾呢叛他布



囊俄齊爾詐病不出兵二十九年出兵又病而  
不出連今一次共計三次訊問得詐病不出是  
實俄齊爾他布囊三次詐病不出殊為可惡如  
此規避者若不懲治則俄齊爾等不知儆戒而  
無効力之人矣二十九年俄齊爾他布囊病之  
真偽未經詳查舉出乞併將臣等議處奉

旨交該部議理藩院奏令他布囊俄齊爾邵塞速赴  
軍前俟凱還之日再將伊等規避不出兵之事

詳審奉

上准行至是他布囊俄齊爾邵塞已歸理藩院議他布  
囊俄齊爾邵塞有厄魯特之警發兵不赴依律  
罰馬各五十匹貝勒額爾德木圖等未經察出  
請議處無庸議

上曰他布囊俄齊爾邵塞出兵規避可惡俱革去他布  
囊餘如所議

戊申

理藩院員外多爾濟奏報噶爾丹情形多爾濟  
奏言臣至扎薩克台吉車陵扎卜所居喀倫之  
外喀喇莽奈地方扎薩克台吉車陵扎卜阿爾  
薩關衛寨桑等已率兵而歸因侍讀學士喇錫  
量帶兵丁往滾噶牢臺阿爾哈蘇臺河俟伊闌  
他米爾偵探一到即歸是以不向前行住於扎  
薩克台吉車陵扎卜所居之地有厄魯特噶爾  
丹屬下達什俄欽納木喀達爾扎班第三人來

投臣等喀爾喀王盆素克旗下阿爾巴楚爾等  
見之携至臣所問之供曰噶爾丹敗率二十許  
人遁至他米爾之台庫勒地方以俟衆人將收  
之丹濟喇丹津俄木布伊喇古克三庫圖克圖  
等俱陸續往會阿喇卜灘自敗以來不見噶爾  
丹另率其屬下人行至他米爾其負獨往見噶  
爾丹遂與其衆俱去丹津俄木布托言創發欲  
往浴溫泉率其屬下男婦共六七百許人於七

月初一日叛噶爾丹而去噶爾丹乃留其輜重  
於台庫爾親率其所有七八百許兵本月初三  
日往追之初七日及之於額德爾齊勞圖之地  
取回男婦五百餘人丹津俄木布本身携妻子  
及六十許男婦向西而逃不知所往噶爾丹於  
本月十七日回至台庫勒率丹濟喇伊喇古克  
三庫圖克圖及達賴喇嘛之使人俄木布喇嘛  
等於十八日向庫冷白兒齊爾挈裝而行住於

其內其地名顏伊等男婦共一千七八百阿喇  
卜灘去噶爾丹所住之地六七日程仍向西行  
其人數我不之知噶爾丹下人馬駝不過一二  
匹而已牛羊全無噶爾丹遣其人名羅卜臧者  
往謂阿喇卜灘曰我等無食當往瀚海之外有  
善巴代青等衆力弱則掠之力強則盜其馬畜  
以為糗糧其人猶未歸又有噶爾丹捕獸之人  
來告曰有五匹馬跡順瀚海而去噶爾丹對衆

寨桑言殆我逃人去爾倘洩其語於善巴代青  
則我等之去亦徒然矣又下人言噶爾丹議欲  
往瀚海其地無水亦且無獸雖到瀚海難以歸  
來我等食無食居無廬隨噶爾丹餓而死耳俟  
到瀚海後即與

聖主地方相近從彼入投

聖主可以求生也我聞吳克爾言吾兄他喇卜及妻俱  
投

聖主是以我等三人與我姐夫阿喇兒拜盜阿爾薩闌  
寨桑馬六匹乘之乞與吾兄吾妻完聚七月二  
十八日自顏之地逃出來投

聖主云為此奏報

庚戌

大將軍伯費揚古奏報噶爾丹遁走翁金地方  
費揚古奏言准理藩院咨稱原著員外舍稜與  
蘇尼特多羅郡王額駙薩瑪扎之子多爾濟扎



卜多羅貝勒博木布之子蘇達尼喀爾喀公車  
木楚克納木扎兒衛徵諾顏阿玉什親身率其  
兵至土喇地方偵探聲息今停其前往著率伊  
等暫在安王所駐喀倫侯大將軍伯費揚古到  
聽其指揮而行等語八月初十日臣至員外舍  
稜所駐喀倫移文舍稜等著仍在所駐喀倫不  
時遣人遠探聲息如有厄魯特人來降報部奏  
聞今舍稜報稱職奉將軍令駐扎喀倫遣蘇尼特多

羅郡王額駙薩木扎旗下佐領察罕喀爾喀公  
車木楚克納木扎兒之三等護衛齊旺等配兵  
三十名直至朱兒揮克爾阿濟爾罕為一路遣  
蘇尼特多羅杜稜郡王達林扎卜旗下鄉導汪  
舒克喀爾喀公衛徵諾顏阿玉什之三等護衛  
俄欽等配兵三十名直至伊察扎罕為一路在  
此兩路偵探消息齊旺等到朱爾揮遇兩厄魯  
特執之而來問之言我等乃噶爾丹屬下阿喇

兒拜寨桑之人吾名丹濟吾弟名多爾穆我等  
在噶爾丹處食無食衣無衣且聞我妻在此特  
來歸投

聖上我等之外別無夥伴前者噶爾丹丹濟喇阿喇卜  
灘丹津俄木布伊喇古克三庫圖克圖及杜爾  
伯特之車陵等俱會於他米爾丹津俄木布率  
明安特之衆叛噶爾丹而去之時約阿喇卜灘  
阿喇卜灘潛遣人告噶爾丹曰丹津俄木布將

叛汝去遣人招我同行我畏丹津俄木布勢强  
故佯從其言矣噶爾丹遂率兵往追之丹津俄  
木布聞其來追率其屬下人及明安特共千餘  
人逃出白杭哈爾海而去噶爾丹阿喇卜灘丹  
濟喇伊喇古克三庫圖克圖及杜爾伯特之車  
陵等俱會於一處其兵有一千五六百噶爾丹  
敗走至他米爾後向土喇遥望遣人通問於我  
吳馬第台吉等覆之曰大兵俱已歸去矣以我

輩潰散故使喀爾喀等各歸故土游牧目下喀爾喀七台吉移其家產住居土喇矣噶爾丹遂會盟言衆喀爾喀如北徙則踰伊克敖喇巴哈敖喇向翁金而行在瀚海以內游牧則掠其偏旁之人再定度冬之策遂自他米爾前徙八日於七月二十五日至俄羅海腦兒駐扎我等即於是夜自俄羅海腦兒逃來除將降人厄魯特丹濟同報文送部外遣厄魯特多爾穆三等護衛

齊旺咨將軍知之等語今噶爾丹敗遁窘迫無糧未必不踉蹌奔突是以檄令舍稜率蘇尼特多羅郡王額駙薩木扎之子多爾濟扎卜多羅貝勒木布之子蘇達尼喀爾喀公車木楚克納木扎兒衛徵諾顏阿玉什等親自帶兵速赴臣軍又發降人厄魯特多爾穆交齊旺解送張家口謹奏

辛亥

命留貯喀倫米糧一千石餘米散給七旗蒙古兵先  
是大將軍伯費揚古奏言臣所領黑龍江官兵  
口糧一月需二百六十許石請將喀倫之米截  
留一千石按月支給官兵餘米交待郎王國昌  
等給賞此截留之米足充官兵四個月之食如  
用之不盡七旗之兵現在臣所請將餘米分給  
隨征七旗協理台吉都統副都統帶去均分各  
旗人衆應將大將軍伯費揚古所留一千石米

支給官兵如有所餘將餘米亦分給王善巴等  
七旗協理台吉都統副都統等均分各旗人衆  
除截留喀倫米外餘米交王國昌給賞之處無  
容議者也

上從之

命遣帥達禮歸其主理藩院奏曰據回回國王阿卜  
都里什特告稱現在京城回子帥達禮之父向  
教某書乞大部轉奏遣歸給某等語查帥達禮



乃噶爾丹屬下回子與噶爾丹使人梅寨桑同  
來及不放梅寨桑入邊驅之使歸梅寨桑謂帥  
達禮之兄沙和卓等漏洩機務殺之奪其家產  
牲畜帥達禮乃率其餘回子騷批達欽阿舒爾  
等步行來投歸化城解部部議伊等與噶爾丹使  
人同來留下者不便安插旗下應發往杭州巡  
撫充綠旗兵奉

旨著將帥達禮與前次厄魯特降人阿木呼郎等附

居收養今當作何定奪謹奏請

旨

上曰著遣帥達禮歸阿卜都里什特

士子

命宥兵部侍郎馬爾漢罪先是以發往軍中馬匹至  
於瘦損

命以兵部侍郎馬爾漢交該部議處至是吏部議曰  
馬一千匹乃緊急軍需也在蒙古地方牧養理

應遣蒙古章京監視而遣一無所知之漢軍滿洲章京以致馬皆瘦損殊為不合應將侍郎馬爾漢革職

上曰馬爾漢從寬免革職

外藩諸王請上

尊號科爾沁和碩達爾漢親王額駙班第等會同奏言我

太祖

太宗開基以來臣等世享太平身受

洪恩茲逢

聖主仁德人皆安樂詎厄魯特噶爾丹獨不自量背天

忘恩殘害邊民

皇上視民如子惻然憫之不憚勞苦親統六軍討噶爾

丹行於無水草之地

謀必萬全坦然遠度出噶爾丹之所不意

皇上神威如霆如雷夫兵整肅

廟算預成遂大創之噶爾丹亡命棄其貲財了身逃  
竄雖得脫出而無用之人終為

皇上所擒臣等竊思

聖主俯恤天下之民滅逆天之噶爾丹於俄頃且使自  
古未服之諸國盡皆來享來王臣等以下至於  
萬民各得所欲靡不踴躍歡忭

聖上豐功大德當加尊號臣等誠惶誠恐謹擬  
聖主徽號曰

弘仁睿德神化以養育萬邦英武以勦除殘暴一統昇

平

上聖皇帝伏乞

聖上睿鑒副臣等之望

上以發大學士等

聖祖仁皇帝親征平定朔漢方略卷二十八

欽定四庫全書

聖祖仁皇帝親征平定朔漠方略卷二十九

九月甲寅朔

檄策旺喇卜灘保護回回國王阿卜都里什特  
阿卜都里什特奏言臣為噶爾丹所擒受冤苦

十有四年仰仗

聖上威靈滅噶爾丹

臣得出而來降合家既蒙

聖上高厚之恩今又使送

臣

歸故土差官併備坐騎食

物而遣之

臣

到土魯番探信或誅噶爾丹或擒

解噶爾丹俟得實音歸

臣

舊居葉爾欽地方再

來進貢請

皇上萬安但往葉爾欽必過策旺喇卜灘地方恐厄魯

特之心無常若無

皇上勅旨未必不虐害

臣

請給

勅書開明

臣

係歸降

皇上之人爾勿得虐害給之前往彼知臣已降



皇上必畏

天威而不害

臣矣

上以為當給發部文着大學士與議政大臣會議撰文

奏覽議曰回回國王阿卜都里什特之父子為噶

爾丹所擒受冤苦十有四年幸逢

皇帝親統大軍之威勦滅噶爾丹阿卜都里什特得乘

間而來降

皇上憐其遠離鄉土在噶爾丹處歷年患難攜之到京

賜之

御用衣冠諸物以及銀幣又使送歸故土特撥官全備  
什物而遣之但往葉爾欽地方恐策旺喇卜灘  
人衆攔阻此無庸發

勅應該部備文檄知策旺喇卜灘開明阿卜都里什  
特等已歸降本朝蒙

皇上恩恤送歸故土原由勿致虐害嗣是以後厄魯特  
與回子當相與和好撰文奏

覽

上從之

乙卯

命西寧多撥人員送回回國王阿卜都里什特等至  
哈密給弓矢諸物理藩院奏言據回回國王阿  
卜都里什特告稱蒙

聖上勅減噶爾丹我乃得脫來投

皇上蒙

皇上加以非常之

厚恩今遣我歸故土又特撥官沿途備給坐騎衣服  
食用諸物直至嘉峪關使我略無艱苦但嘉峪  
關以外既不諳道路而夥伴人少乞撥人護送  
我等至哈密且我等無弓矢撒袋諸物請至嘉  
峪關頒給我等據此具奏

上命該地方官交喀什撥回子二三十人送至哈密行  
文地方官給之弓矢諸物阿卜都里什特

恩賜已畢請今於是月初三日起程

上准其起行

命發厄魯特降人至京附入旗伍有不願者遣往大將軍伯費揚古軍前招撫噶爾丹先是理藩院奏

言據

臣

部郎中滿都報稱今已涼爽必遷厄魯

特入京查陸續來降之厄魯特大小人口共一

千五百三十七人內除取至京城喇嘛羅壘厄

木齊格楚兒席喇卜喇木札木巴等夥伴回回

國王阿卜都里什特等夥伴隨員外舍稜前往之唐古特寨桑等共二十口死者八口所剩大小人口共一千五百九人內有乘驛送來者又有無馬畜者如令伊等赴京其無馬匹者或給驛車或另設法候部裁奪至伊等沿途口糧如從張家口支去則費牲口馱負乞咨該部行文沿途支給口糧每人給肉其丹巴哈什哈等六百餘口係左翼察哈爾官兵看守台吉塞冷札

卜米寨桑等八百九十許口係八旗章京率兵  
三百看守倘遷厄魯特降人入內或仍令原舊  
看守官兵護送或令邊關之兵綠旗官兵沿途  
護送候部裁奪又據滿都呈稱康熙三十五年  
八月二十四日丹巴哈什哈來告曰我妻達什  
言前次降人代綽特之西里杜喇兒和碩齊等  
六人其妻子不來其意有仍歸噶爾丹之狀此  
輩不可信爾等當防之我以為

聖上如此加恩伊等焉往是以不告近來西里杜喇兒  
和碩齊來告我曰聞我妻子俱在噶爾丹所此  
地無一依靠之人難以為生我等意既無所定  
天又寒矣無人縫補炊爨何以度日八旗營內  
有我一舅母阿民台其子阿咱喇僕婦和洛里  
請使伊等與我等完聚以此言觀之則與我妻  
達什前言相符且西里杜喇兒和碩齊常與噶  
爾丹僕人亦無妻者名孟克偶語沙中是以我



告彼曰

聖上寬宥我等待以不死又如此恩養奈何作此意雖  
目下無歸若到

聖上馬足之下自有妻矣今為此等人不可信請謹防  
之據此責令看守厄魯特之四旗察哈爾叅領  
等官龔格額兒追等小心防備嚴加巡警外恐  
西喇杜喇兒和碩齊等脫逃飭令防護於鑲黃  
旗營中取彼舅母阿民台等一同安插至此等

妻子不來者思念妻子雖不能去未必不搖動  
衆心應將此輩作何措置乞大部速行定奪為  
此奏

聞

上諭內大臣索額圖明珠大學士伊桑阿阿蘭泰尚書  
馬齊曰今天時已涼着取丹巴哈什哈等來京令  
副都統吳達禪乘驛而往同納喇善滿都遷來又  
滿都報稱無妻子者心無所定倘厄魯特有不願

內來者即從彼處送赴大將軍伯費揚古軍前着  
將軍伯費揚古給不願來者各馬一匹遣回令彼  
往諭噶爾丹言彼若來降亦待以顯榮其看守厄  
魯特等之察哈爾兵各歸本地至解厄魯特降人  
到京着邊關官兵綠旗官兵轉遞押解并令戶部  
理藩院賢能官各一員前往沿途給口糧食物及  
馬草料小心解來內有幼童婦女無馬匹則酌給  
驛馬驛車既取伊等到京應令議政諸臣會議編

入隊伍具奏至是議政諸臣議曰據郎中滿都報  
稱降人丹巴哈什等厄魯特共一千五百九  
口內除歸併先降之巴拜者人口一百七十五  
名回回國王阿卜都里什特人口十二名外現  
存厄魯特人口一千二百零應編入鑲黃正黃  
正白三旗滿洲佐領其內有父子兄弟不可離  
者如編入一佐領為數浮多則扣筭一佐領人  
口其餘編入本叅領內之佐領以丹巴哈什哈

等七十五戶為一旗以察罕西達爾哈什哈等  
八十二戶為一旗以台吉憨都等七十五戶為  
一旗伊等目下既到其所居住應着都統副都  
統佐領以本佐領下房屋暫行安插所給伊等  
房屋該部另奏請

旨其六十歲以下十五歲以上人等於佐領披甲額  
外令其披甲食糧其內喇嘛之廝役及有主之  
廝役各附其主不准給糧其各項工匠不令披

甲給以工匠之糧在工匠內服役俟到日起各項食物照新滿洲例給與丹巴哈什哈察罕西達爾哈什哈台吉憨都等應以何人為何旗授以何職伏候

皇上指示其六十餘喇嘛著理藩院交默爾根綽爾濟安插何廟具奏請

旨此安插之厄魯特內日後有增有減另議俟

命下之日將扣抵三旗口數名字彙造清冊各給本

旗厄魯特一到各旗差官收領內有年老孤身  
附入人口少者之家給米贍養奏入

上從之

丙辰

勅詰大將軍伯費揚古

諭費揚古曰據此際噶爾丹地方逃來人言迫於饑  
凍此大機會有

上天眷佑授我之象此不可復失爾等當着實留心前朕

親至克魯倫之時若爾等之兵能趲行三日到巴  
顏烏蘭左側噶爾丹何能得脫設商南多爾濟來  
後或以所到之地奏聞一次或朕所差殷扎納額  
林辰等於十三日前到則朕軍何故回師因爾軍  
斷斷不到俱至饑餒故回師調撥軍糧然而脫出  
如許人降者逃回誠不料及此也此等之事至今  
追悔不盡爾兩大將軍相會之時朕軍之馬甚壯  
理當選擇換馬追之收取離散之人其時雖散因



無人收之故一一聚而成羣宜矣今爾等成算如  
何噶爾丹形勢如何朕因懸隔急欲聞之特發手

書往諭

川陝總督吳赫奏報哈密回子頭目額貝杜拉  
達爾漢白克遣人進

貢來降吳赫奏言據署理肅州總兵官印務副將  
韓成呈稱哈密回子頭目額貝杜拉達爾漢白  
克差回子阿林白克賚奏章及進

貢獨峰駱駝一頭馬二匹駱駝八頭小刀一柄誠  
心歸投

皇上等因到

臣臣

思哈密回子頭目額貝杜拉達爾漢

白克差阿林白克誠心向化來降真

皇帝德威遠播之所致也於是往取臨洮道勘合俟到  
時撥官及通事令阿林白克起程赴

京為此奏報

以郭爾羅斯台吉畢立滾俄齊爾助馬

命陞為一等台吉先是

上諭理藩院曰郭爾羅斯扎薩克四等台吉吳爾圖那蘇圖鄂齊爾旗下二等台吉畢立滾俄齊爾是役軍中助馬較衆最多着部議奏至是理藩院奏康

熙十六年十月內陝省花馬池等處効勞俄爾多斯多羅貝勒索諾木旗下四等台吉吳魯雅克等十六員因從軍各陞一級後議叙有出征頭等功牌又陞一級今二等台吉畢立滾俄齊

爾雖無功牌而是役軍中助馬較衆最多應陞  
畢立滾俄齊爾一級為一等台吉

上從之

命給將軍孫思克博濟赴京官兵口糧馬匹草料兵  
部奏言將軍孫思克博濟咨稱某等奉

旨已於八月十七日到京除本將軍副都統及總兵  
官等不支口糧草料外西安將軍帶來八旗滿  
兵漢軍官二十六員兵五百名僕從共一千九

十三名馬共一千四百十七匹孫思克帶來官  
十二員兵一百三十二名馬共二百十六匹乞  
自入京之日為始給伊等口糧草料據該將軍  
既稱本身及副都統總兵官不支口糧草料應  
不議外滿洲官兵及綠旗官兵俱係奉

旨來京之官兵應檄戶部於此項官兵自該將軍九  
月初一咨部之日為始算到起行以前照例給  
口糧草料奏入

上從之

丁巳有

旨出巡張家口發兵擇日先是大將軍伯費揚古奏

王善巴哨卒來報八月二十四日在達蘭土魯

地方見有厄魯特形影因調右衛兵一半前來

上曰前命安王將軍薩卜素來京今着停止各率其兵

赴大將軍伯費揚古軍前着議政諸臣集議至是

議政諸臣議以為應令安王將軍薩卜素赴大

將軍伯費揚古軍中得

旨朕將往宣化府地方試鷹當減從而往侍衛撥二百員御營撥三旗新滿洲護軍驍騎三百名著帶子弟以代僕從撥三旗親隨護軍每旗三十名八旗前鋒四百名火器護軍一千名每旗帶馬上礮三門此次隨駕前鋒護軍驍騎以佐領內拴喂之馬每人各給四匹乘坐侍衛內有無馬之人亦各給馬四匹乘坐此從行侍衛護軍不論曾否出征

俱閱家足人強者派出火器護軍千名分為兩營  
其坐馬將漢軍旗內所拴之馬亦選與坐用此行  
不過試鷹諸色人等不得告請從行其料理馬匹  
着戶兵二部料理起行日期於九月初十日以外  
十五日以內揀擇其部院官員不得多派照哨鹿  
例從少派出兵丁之糧亦從少支取張家口貯有  
米在到彼再給

督理運務于成龍等回京中路督運都御史于



成龍通政使喀拜於科圖地方撥給口糧事畢

回京復

命于成龍等奏曰

臣

等督運正米二萬七千石給過

中西兩路滿洲綠旗官兵挽車人夫及絕糧諸  
人一萬八千石有零外所餘八千一百九十六  
石五斗零內堆貯揆素地方之米三千六百六  
十石七斗零給過三省挽車人夫及綠旗兵所  
餘堆貯小米四千五百六十石八斗零堆貯察

罕腦兒之米四千五百二十九石三斗零小米  
四十七石零以上正米小米共一萬二千八百  
六石三斗零俱小心堆貯其米上空布袋一層  
蓆二層布油單二層共蓋五層緊急拴繫其米  
下墊以破車松板堆貯地方兩處週圍掘壕深  
五尺濶六尺此米同理藩院尚書班第親交蘇  
尼特阿霸垓等旗台吉祁他特都統畢瑪喇等  
小心看守謹奏

戊午

命隨便安設驛站兵部奏言是行也除內地驛站照常安設外但今春出兵因蒙古馬匹羸瘦調內地驛馬一千匹協助是行或仍前以內地驛馬協助或僅用蒙古馬匹安設俟

命下之日會同理藩院議之

上曰蒙古驛站不至有悞朕亦沿邊而行所行不遠調馬之事無庸預議如或出邊再酌量施行右衛護

軍統領費揚固等奏報率兵起行赴大將軍伯費揚古軍前副都統拜音布馮國祥等報曰據大將軍伯費揚古咨稱善巴王巡哨之人言在達闌圖魯地方見有厄魯特形影飛塵着將爾右衛護軍統領副都統夸蘭大駐防協領各章京及護軍驍騎火器營兵皆撥一半以留下官兵之馬填給乘坐文到次日起程中途一宿次日到歸化城自歸化城踰翁滾嶺第六日到巴

顏布喇克再帶子母砲十六門每旗各給二門  
支百次火藥鉛子而來據此護軍統領宗室費  
揚固瓦爾達副都統黨愛柯爾對夸蘭大駐防  
協領各章京護軍驍騎火器營兵俱率其半於  
九月初二日起程矣為此奏報  
黑龍江將軍薩卜素以赴京奏

聞薩卜素奏曰

臣遵

旨以兵四百交駐防協領胡布納等由口外遣回

臣

率兵一百赴京

已未

尚書班第以給賞之事奏

聞先是有

旨謂是役修道鑿井監牧坐塘蒙古台吉官兵應給

恩賞至是班第奏言

臣等遵

旨查修道監牧鑿井兩阿霸垓兩阿霸哈納爾兩蒿

齊忒兩蘇尼特及坐塘兩烏朱穆秦克西克騰

十一旗共賞過銀二萬四千九百四十兩其銀  
自都御史于成龍處支用至給賞之時台吉官  
兵跪告臣曰我蒙古幸逢

皇上昇平之世安居樂業而噶爾丹擾害邊人竊踞巴  
顏烏闌等處地方使我輩不得安生蒙

聖主為我沿邊蒙古

親統大軍深入敵境勦滅噶爾丹自茲以後我等永  
得安寧矣少長歡呼無不向

闕稽顙今又蒙

聖上慰勞加以

洪恩賞賚不勝感激乃望

闕謝

思臣欽惟

皇帝以噶爾丹逆天刼奪北邊掠喀爾喀納木扎兒陀

音竊踞巴顏烏闌等處復伺刼喀爾喀

皇上預籌熟計欲一舉滅之



乾剛獨斷發大兵各路堵剿

御駕親統六師而出

天威難抗中夜遁逃

皇上統大軍深入敵境追至拖諾等處噶爾丹窘迫已

極僅圖亡命盡棄諸物日夜奔逃值

皇上預定廟謨詳加指示遣費揚古之兵堵禦剿除擊

而殺之俱與

聖上謨略纖毫不爽事事符合允如

皇上百日成功之

諭十旬之內竟滅噶爾丹亘古以來未有如

皇帝之勇略俱全殊猷異績也

臣

等愚劣不能記憶筆

不勝書幸逢

聖世聞此凱音無任懼忭謹頓首稽首上

聞

辛酉

命總兵官王化行協助巴圖爾額爾克濟農

上諭戶部尚書馬齊兵部尚書凱音布等曰噶爾丹寔  
迫已極近朕差阿南達以巴圖爾額爾克濟農之  
兵堵禦其外恐噶爾丹乘虛往巴圖爾額爾克濟  
農行劫着爾兩部檄總兵官王化行如噶爾丹往  
巴圖爾額爾克濟農處即率其兵往援併諭巴圖  
爾額爾克濟農知之

壬戌

命寬喀瓦爾達阿喇卜灘等免革職先是

上撥前鋒二百往送使人以喀瓦爾達阿喇卜灘為首  
領有勿過燕圖庫勒圖即從彼地縱使人前去之

諭伊等違

旨出其外馬被厄魯特所奪交該部察議至是兵部

奏曰喀瓦爾達阿喇卜灘違

旨越過燕圖庫勒圖巡警不嚴被厄魯特奪去如許  
馬匹應將喀瓦爾達一等侍衛佐領俱革去鞭  
一百不准折贖令披甲効力將阿喇卜灘多羅

額駙一等台吉革去罰九九牲畜入官其額駙

噶爾臧台吉俄齊爾不為首領無庸議奏入

上曰喀瓦爾達阿喇卜灘等並非戰敗着從寬免罪

命宥修路侍郎多奇等罪先是

上諭大學士伊桑阿曰獨石口之路竟不修治經行路

中此路最不堪着發部嚴加察議關係軍務不得

議以尋常之罪侍郎多奇乃專管修路之人其事

惟何朕再三申諭修路之事重大今值寒凍當先

修石嶺等處暫緩結冰之地勘明備工俟地將融  
動工修治則力不勞而行不悞爾當儆之乃違朕  
指揮不加詳閱在凍處草草塞責及至地融已成  
泥濘致悞大軍行路殊為可惡至是吏部議侍郎  
多奇曰北道常明揚赤城縣縣丞程揚洪俱革  
職交刑部拿問從重治罪

上曰前以行軍凡事不可不嚴故將多奇交該部議罪  
今自軍中來見多奇等所修之路大兵往返并無

所悞着俱從寬免罪

癸亥

命撥侍郎多奇席米圖於大同宣府地方喂右衛兵  
丁馬匹先是

上諭公常泰尚書馬齊曰據將軍費揚古奏言厄魯特  
見我邊汛備兵而遁應於十四日發兵起程朕躬  
於十九日發駕着議政大臣會議議政大臣遵照  
諭旨請於十四日發兵起程

御駕於十九日啟行

上命議政諸臣會集面議至是議政諸臣入奏

上曰朕躬仍於十四日前往試鷹所發兵照常在京預備如有所用再來調發目下着右衛兵一半秣馬俟肥後換費揚古帶往之兵前來秣馬大同則着撥侍郎多奇宣化則着撥侍郎席米圖監督喂養命撥扈從大臣兵部開列大臣名姓奏請分別隨駕前行留京備兵之人



上命都統周卜世統領托倫蘇丹塞稜格副都統吳達  
禪等護駕前行其餘大臣俱與大兵一同預備

乙丑

命定軍行日期

上諭兵部曰除前撥八旗前鋒四百名外再增撥前鋒  
四百名朕於十九日發駕令大兵於十九日一二  
日前起行軍行日期着欽天監選擇具奏侍讀學  
士喇什奏報噶爾丹情形喇什奏言噶爾丹屬

下人克齊克默爾根等來降言丹津俄木布叛  
噶爾丹而去噶爾丹發輜重往庫冷白兒齊爾  
使之待已其身率兵往追之臣等欲探其聲息  
若何且以收其零散之人故親駐憨山左側自  
憨山遣鄉導叅領達爾漢伊羅兒圖等率兵往  
探伊羅兒圖還告曰我等從克齊克默爾根逃  
來踪跡前行到一地與過抗愛之嶺相對見有  
數道踪跡俱逾抗愛山而去無他往踪跡在我

等未到之前已過去十餘日故我等即從彼地  
還八月二十七日丹巴哈什哈親弟吳默叩默  
爾根寨桑等男子四人婦女四人至喀倫降言  
我向為丹津俄木布之護衛近身隨行我兄丹  
巴哈什哈來降

聖上之後噶爾丹使我代吾兄管倬和爾部落人衆授  
為寨桑早欲來歸

皇上奈不得脫身之便及丹津俄木布與噶爾丹反顏

叛之而去我隨丹津俄木布亦去噶爾丹追至  
額德爾齊牢時已昏是日不戰丹津俄木布知  
噶爾丹力尚強語衆曰我等與戰則不能敵同  
行必為所掩我等當各自分行會於阿兒台地  
方往投策旺喇卜灘於是零星分散丹津俄木  
布率六七十人而去丹津俄木布之妻父察渾  
台吉率百餘人向圖爾古特而去明安特之納  
瑪什希台吉率四百餘人向洪郭賴而去噶爾

丹收取百餘人原欲往庫冷白兒齊爾不知其  
已去與否阿喇卜灘一概不預往空奎扎巴喀  
居住目下噶爾丹人有千餘阿喇卜灘雖無牛  
羊而馬駝尚多噶爾丹即馬駝亦殊少今天時  
漸寒大半無居無食噶爾丹未必能保有其下  
人殆必散盡矣

副都統阿南達奏報設哨於布隆吉爾等處阿  
南達奏言遵奉

聖上成算於布隆吉爾之巴爾庫兒塔兒納親等路其  
地名博羅川濟則遣藍翎布達及巴圖爾額爾  
克濟農之布兒噶齊達爾漢寨桑馬賴額爾克  
喀什哈率十人駐劄於額布格特阿木格特地  
方則遣巴圖爾額爾克濟農之祁勞默爾根薩  
里呼納親率十人駐劄於布隆吉爾之敖齊喀  
喇莽奈地方則遣驍騎校齊倫喀爾喀白蘇特  
扎薩克默爾根濟農一等台吉索諾木伊思扎

卜旗下都統額爾德尼寨桑達爾漢他布囊率  
三十人駐劄於昆都倫額濟內地方則遣喀爾  
喀台吉帶青巴圖爾哈米爾巴圖爾額爾克濟  
農之渾他漢占哈什哈布達禮杜喇兒和碩齊  
率五十人駐劄九月初一日遣使起行矣竊思  
坐哨之人若至嘉峪關肅州等處來報而後趨  
赴恐其已過有失機會若阿南達親身至布隆  
吉爾之都爾白兒濟形勢地方乃兩邊哨卒遞

報之路僅率巴圖爾額爾克濟農等設哨餘剩  
之兵一百五十人往則為力甚薄故與提督李  
林隆共議增綠旗兵四百子母砲二十門臣親  
率之於九月初三日自肅州起行矣為此奏報  
副都統阿南達奏報遣人曉諭哈密回子阿南  
達奏言臣向甘州而來遇進降表回子令此內  
回子名俄羅斯者配以通事任義甫及臣家人  
二名往告其頭目如噶爾丹來人力少則擒之



人力多則驗明數目來報若噶爾丹至汝地給之糧馬縱之使去或不來報則爾等所奏無信矣噶爾丹豈能居此守護汝乎當熟籌之又教通事任義甫及臣家人使探常明英古出差策旺喇卜灘歸信及噶爾丹消息俟彼回時另行奏報

副都統阿南達以喀爾喀白蘇特扎薩克默爾根濟農等告請効力之事奏

聞阿南達奏言喀爾喀白蘇特扎薩克默爾根濟農  
一等台吉索諾木伊斯扎卜協理旗務台吉伊  
爾登和碩齊格寧台吉帶青巴圖爾哈米爾畢  
力克圖胡魯木什俄木布西第巴喇額爾德尼  
俄木布等來告曰我等蒙

皇上泰養之恩圖報無地請於戍哨偵探之事効力為  
此奏

聞

員外二郎保奏報青海聲息二郎保報言八月  
二十二日差守備平朝正撥什庫哈什台於善  
巴陵堪布曰汝前謂一槩言語若不啟聞達賴  
喇嘛不得擅以己意相覆俟啟聞達賴喇嘛其  
言如何當據實報聞未知汝差彼西方之人已  
歸否如已歸其言云何噶爾丹三十許人逃至  
青海地方矣其人衆寡姓名及諸凡聲息俱密  
探而歸平朝正等九月初二日還言我等八月

二十三日至善巴陵堪布所以所諭之言告之  
堪布言達什巴圖爾台吉曾遣其人往使西方  
爾等往問巴圖爾台吉台吉殆知之我等往台  
吉所以是言告之台吉言我使人往西方未歸  
俟歸後達賴喇嘛如何諭我等當以其言告汝  
又問之曰聞噶爾丹三十許人逃至青海地方  
其人何名共有幾人噶爾丹逃向何方巴圖爾  
台吉告曰前年噶爾丹興兵掠厄魯特之杜爾

伯特國有一逃來者乃杜爾伯特國之人其名  
綽克圖率其人三十許逃來在阿齊巴圖爾台  
吉所此綽克圖乃歸降

聖上之人陀音之子巴拜台吉一族綽克圖言噶爾丹  
已向洪郭賴而去殆往投烏郎哈木多爾諸人  
爾又各處細訪杜爾伯特三十許人逃來在阿  
齊巴圖爾處是實別無異聞為此奏報

丙寅

大將軍伯費揚古以丹濟喇遁走之事奏

聞費揚古奏言

臣

等遣善巴王旗下副都統善巴

爾等偵探彼差人來報曰我等於阿濟爾布都  
納以南地方見有厄魯特屯劄布都納即退回  
數里藏於隱密之處覘其行踪之多寡次日不  
見彼前來善巴爾等又前往視之使以此情來  
報八月三十日到臣等料厄魯特未必不退故  
遣人招降以羈縻之語噶爾丹爾戰敗無糧難

以度冬不知大兵在此欲剽掠零星之喀爾喀  
度今冬耳

聖上洞鑒此情早遣大兵俟爾於邊塞之地今

聖上猶不忍爾破壞失其生業遣卓力克圖達爾漢巴

克什等傳

諭爾爾當熟籌久遠謀生之策遵

旨來歸

聖化則爾必依舊得所矣不但爾噶爾丹然也凡人來

降

皇上亦必使之得所以此備文使員外舍稜解來厄魯  
特降人馬尼默德賚之交鄉導阿南達引路令  
見厄魯特形影縱而遣之又副都統善巴爾等  
遇厄魯特納瑪喇什來降九月初一日解到

臣

所問據納瑪喇什曰我乃阿喇爾拜之人住居  
額河噶爾丹戰敗無食窮困已極噶爾丹言滿  
兵大勝俱已進京喀爾喀等必出塞游牧可乘



其隙取糧於喀爾喀以度此冬故使丹濟喇等  
率兵一千五百南來既到阿濟爾布都納地方  
此地所遣厄魯特卓力克圖達爾漢巴克什津  
巴到告之以

聖上遣兵堵禦邊汛丹濟喇等聞之遂紛紛遁去我乘  
此隙內來歸降卓力克圖達爾漢巴克什等初  
相見之際言我等逃出丹濟喇不信而窮詰之  
又對以釋之而歸其他言語我未之聞也於是

臣等率黑龍江兵衆扎薩克蒙古兵欲往阿濟爾布都納隨勢相機而行已於次日初二起程檄右衛兵作速踵我軍而來外具本同降人納瑪喇什一並賫送又奏言善巴爾等以厄魯特降人十名來言我等至阿濟爾布都納乃厄魯特屯劄之地見無一人但有所食馬骨棄其鎗柄而去正查視之時有厄魯特俄兒都孫伊爾都齊阿哈里查木楊彭楚克西喇卜達爾扎賈

圖額爾克杜喇兒達爾巴格隆阿哈第等十人  
自郭多里地方來降言丹濟喇之行甚速自郭  
多里而前去矣我等又前行數里以觀之馬疲  
不能急行而回視其行踪有一千四五百人問  
俄兒都孫伊爾都齊等與前降人之言無異是  
以將俄兒都孫伊爾都齊等十人解交收集降  
人郎中滿都其厄魯特陸續人降不絕問之俱  
與前降人之言無異亦解郎中滿都訖謹奏

命給黑龍江將軍兵從口糧裘帽先是將軍薩卜素  
奏言據兵部咨稱奉

旨命安王將軍薩卜素來京今着停止各率其兵赴  
大將軍軍前欽此前奉八月二十三日之

諭分兵四百從口外遣回

臣

率兵一百前來今謹遵

旨率此一百兵星赴大將軍軍前但我軍出行原帶  
糧米算至七八月回汛故無冬衣裘帽者多伏

祈

勅部頒給兵從裘帽等物并議本軍口糧何處支取  
奏至

命交兵部理藩院會議至是議前者給過黑龍江兵  
口糧算至十月初一日為止如未到大將軍伯  
費揚古軍前其糧或完則至歸化城後計其兵  
到日支米俟到大將軍軍前將王國昌所運米  
內截留之一千石按兵支取其兵從既無冬衣  
裘帽應自工部取大羊皮裘大羊皮帽各二百

撥兵部理藩院司官各一員速送至將軍薩卜  
素軍前散給兵從奏入

上從之

命自張家口設驛至大將軍伯費揚古前進地方先  
是

上諭尚書馬齊等曰着撥爾部賢能司官一員自張家  
口設蒙古驛至將軍費揚古所往地方至是理藩  
院奏自張家口以外設蒙古驛至大將軍費揚

古所往地方應撥臣部司官乘驛先往於歸化城衆喇嘛殷戶附近旗分取馬每驛安設馬二十匹蒙古章京一員兵十名其設驛時取各部院筆帖式八員前往至撥什庫則遣臣衙門撥什庫去奏入

上從之

命授丹巴哈什哈等職先是

上諭議政諸臣曰丹巴哈什哈等雖敗後來降着以大

職議叙其先降之俄欣阿穆呼郎等在其次議叙  
俄欣既係先降而是役於西路軍中甚為効力至  
本第達爾扎又在其次議叙至是議政大臣議曰  
丹巴哈什哈察罕西達爾哈什哈雖敗後來降  
既特來投

皇上請加

恩優授為二品官其梅寨桑憨都等彼在本地原係  
顯職請加



恩優授為三品官其五品官俄欣早已來降而是役  
西路軍中殊為効力亦請優陞為三品官其與  
俄欣同降之六品官多爾濟塞稜博托請陞為  
五品官先降之六品官阿穆呼郎額墨根布林  
舒格卓里克俱陞授為五品官至附於正黃旗  
之索諾木在五品官俄欣之後續降請加  
恩優授為五品官達爾扎雖微賤之人然在噶爾丹  
未敗之時先降請加

恩優授為五品官本第於兵將敗先降請加

恩優授為六品官是役厄魯特降人內有當給官職

者候大將軍伯費揚古到日再議具奏

上曰丹巴哈什哈西達爾哈什哈着授二品官為散秩

大臣梅寨桑憨都着授三品官俄欣着取為一等

侍衛餘如議

聖祖仁皇帝親征平定朔漠方略卷二十九